

Putovanje ka vječnom životu

POŠTOVANI, da li si se ikada upitao zbog čega smo stvoreni od neznatne kapi tekućine i zašto smo upravo mi – ti i ja, naši najdraži, i naše komšije i poznanici – izabrani da budemo Allahovi namjesnici na Zemlji? Misliš li da smo uzalud odabrani, a nakon toga i stvoreni, te da je sve bila puka slučajnost? Da li si ti birao mjesto, vrijeme ili roditelje koji će te roditi, ili koje će ljudske karakteristike tebi biti svojstvene? Misliš li da je ovosvjetski život svrha sam po sebi i da ljudi za njega nikada neće odgovarati? Da li znaš koja je mudrost u tvom rađanju i postupnom odrastanju, i zašto će te neminovno zaustaviti smrt onda kada otkuca i posljednja sekunda tvoga ovosvjetskog života?

Priznaj da vrlo rijetko ili čak i nikako o tome ne razmišljamo, baš kao što ne razmišljamo ni o bezbrojnim Allahovim znakovima koje nam neprestano šalje. Priznaj da skoro pa i ne vidimo Njegove jasne dokaze i poruke u sebi i u svim stvorenjima oko nas. Kao da ne želimo da shvatimo da je ova zapanjujuća harmonija, sklad prirode i čitavog kosmosa, zasluga Veličanstvenog Allaha, Stvoritelja i Gospodara svih svjetova, koji je sve sa mudrim razlogom stvorio, a da je nered koji vlada na Zemlji upravo zbog obijesti pohlepkih ljudi koji, daleko udaljeni od Allahove upute, narušavaju uspostavljeni sklad, sebično želeći udovoljiti svojim strastvenim prohtjevima?!

Uistinu, mnogi ljudi se varaju i uzaludno troše svoje vrijeme tražeći ovosvjetsku sreću i zadovoljstvo u zasićenju svojih ljudskih nagona, jer sreća se tu ne nalazi! Do istinske sreće vodi samo jedan put, put pokornosti Allahu, a on je jasno objašnjen Njegovim uputama. Taj put svi trebamo odgovorno proputovati kroz naš ovosvjetski život...

Istina o prolaznosti ovosvjetskog života

Ovosvjetski život – dunjaluk – prolazna je kuća kroz koju ćemo svi neminovno proći, i nije kuća u kojoj ćemo vječno ostati. To je naš trenutni dom, privremeno boravište u kojem se kratko, sa zadatkom zadržavamo određeni broj godina, dana ili mjeseci, shodno Allahovoj odredbi, a nikako dom u kome ćemo trajno i zauvijek živjeti. Uistinu, kroz život mi neizbježno putujemo! Naše istinsko boravište, posljednja stanica našeg putovanja i pravi dom je u beskrajnoj vječnosti, tamo gdje ćemo po zapovijedi našeg Stvoritelja zauvijek ostati shodno zasluži stečenoj u ovosvjetskom životu.

Dunjaluk – to je plodna bašča na kojoj se privređuje za vječnost. On je jasna odrednica našeg opredjeljenja za sretan ili nesretan beskrajni život. Kada nastupi njegov kraj, tada će se okončati i svaka naša šansa za pokajanjem i ispravkom...

Zbog toga, svaki čovjek bi se na dunjaluku trebao ponašati kao istinski putnik koji odgovorno priprema svoju probranu putnu opskrbu koja će mu pomoći na njegovom neizbježnom putovanju, jer na njemu on privređuje za svoju vječnost: ili za vječnost u apsolutnim džennetskim užicima ili za vječnost u besmrtnoj i kobnoj džehennemskoj patnji.

Vrijeme našeg života polahko otkucava

POŠTOVANI, tvoj životni vijek strogo je određen tačnim vremenskim periodom. Kako vrijeme prolazi, tako se gubi i zauvijek nestaje dio po dio tvoga dragocjenog života.

Zar ne osjećaš da stariš i ne primjećuješ promjene?! Zar još uvijek nisi ubijeđen da na ovom svijetu ništa nije vječno, već da sve ima svoj početak i svoj neprikosnoveni kraj? Zar oko sebe ne vidiš mezarja koja te nijemim šapatom dozivaju, savjetuju te i upozoravaju jer ćeš i ti jednog dana postati njihov stanovnik?! Iskreno se upitaj da li si uzaludni gubitnik ili svoje vrijeme i život odgovorno iskorištavaš?

Svaki dan koji protekne umanjuje tvoj vremenski period života, a približi te tvome kraju. Kako prolaze dani, tako se troši i dio tebe... Tvoje vrijeme boravka među stvorenjima polahko otkucava. Nisi vlasnik odluke i ne znaš kada i kako

će te smrt zaustaviti, baš kao što nisi bio ni pitan za svoje rođenje! Nakon toga ćeš biti ispitivan...

Znaj da se tvoji postupci zapisuju i bilježe! Mastila olovki koje su zabilježile tvoja životna djela već su se osušila, a one stranice iz knjige tvoga života, koje su ispunjene, sklopljene su i neće se otvarati dok ne staneš pred konačnu SUDBU svoga Tvorca, Uzvišenog Allaha. Bit će to SUDNJI DAN, Dan promocije ljudskih djela, Dan u kome ćeš biti detaljno ispitivan na osnovu djela iz knjige svoga života!

Na raskrsnici puta ka vječnosti

Vječnosti polahko i konstantno hodimo, željeli mi to ili ne, a naši postupci se i dalje pomno prate i marljivo bilježe. Na tom neizbježnom putu podjednako idu i vjernici i nevjernici, i dobročinitelji i grješnici, i mladi i stari, i žene i muškarci, i ljudi i džinni... Svi! I svi će do nje stići, jer, i to je Allahova odredba!

Još uvijek nije kasno za samoobračun i iskreno pokajanje. Još uvijek su kapije pokajanja širom otvorene u iščekivanju sretnika koji će hrabro priznati svoje slabosti i kroz njih ponosno proći. Još uvijek Uzvišeni Allah nudi Svoju beskrajnu samilost i veličanstveni oprost za svaki ljudski grijeh i raduje se onim robovima koji se pod okrilje Njegove upute sklone od najezde šejtanovog došaptavanja! Nudi im šansu!

Razmisli o sebi i o svome životu, jer, doista se nalaziš na raskrsnici velikog puta koji neizbježno vodi ka životu u vječnosti. Ako kreneš stranom istinskih vjernika, bit ćeš sretnik u ovomsvjetskom i u vječnom životu, a ako izabereš Iblisovu, šejtanovu stranu, uzaludno ćeš se kajati i lažno oslušivati sreću u ovomsvjetskom, a u vječnom životu bit ćeš neprestano "nagrađivan" silnom patnjom i kažnjavanjem u Vatri!

POŠTOVANI, ove retke istinitih riječi iskreno ti upućujem iz dubine svoga srca u nadi da ću i tvoje srce prijateljskom toplinom ugrijati. Ne želim te uplašiti, niti kazati da si bezvrijedna jedinka u ovom prolaznom životu! Želim ti probuditi nadu, podstaknuti te na ponuđenu šansu prije negoli bude kasno i ukazati na tvoju neopreznost. Želim ti uputiti iskreni savjet jer sam veoma uznemiren zbog tvoje neodgovornosti prema ljudskom životu!

Uzvišeni Allah je davno objavio: **"Tako mi vremena, svaki čovjek je, doista, na gubitku, samo ne oni koji vjeruju i dobra djela čine, i koji jedni drugima istinu preporučuju i koji jedni drugima preporučuju strpljenje."** (Plemeniti Kur'an, prijevod značenja sure El-Asr)

PUTOVANJE ka VJEČNOM ŽIVOTU